

鄉賢六

邑人張森楷學

袁延燾宋合州石照縣人兄延度官合州通判自有傳淳化五年延度起義討賊延燾輔其決所向有功既克復合州因進解遂州圍轉運使雷有終上其功詔授合州右防城使兼中軍使王廣儒復糾羣賊攻合延燾以其眾陷陳賊大潰追奔至臥龍山伏發死之年二十四麾下跡延燾所在見蟻封高數尺眾異焉剖之得延燾屍以歸子晃後登進士第張乃孚合州志森楷案舊選舉志所載進士有袁蒙正于元祐中登第第袁頤正于元符中登第袁豈于紹興中登第皆距延燾之歿百有餘年非其子也此外無袁晃名蓋志文有脫當據此傳補晃名于真仁英神間以備參攷

趙孟壘合州人宋太祖第四子秦王德芳裔孫九世祖惟憲以秦王第二子歷官昭信軍節度使兼侍中封英國公八世祖從湜封遂甯侯七世祖世環封崇國公六世祖合杓右侍禁五世祖子種秉義郎子種以下無官者四世蓋史所謂靖康之變往往淪徙死亾于兵難南渡所存十無一二而國之枝葉日以悴者非與合州舊有宗室趙氏淳熙中有進

合川縣志卷四十七 鄉賢六

攷宋以下至而攷應作夾注誤入正文

士趙師仁攷宋宗室名師仁者有十皆出燕王房一為從義郎子叔之孫伯謨之子一為右朝請大夫子琥之孫伯昌之子一為修武郎子雍之孫伯成之子一為贈左領軍衛將軍子璐之孫伯輯之子一為武訓郎子宴之孫伯魚之子一為朝請郎子翼之孫伯埔之子一為從義郎子晒之孫伯霖之子一為武翌郎子思之孫伯誠之子一為贈金紫光祿大夫子益之孫伯瑜之子一為子璪之孫伯瓊之子此師仁不知究為誰之孫子舊志不詳今未得而攷其後有嘉定進士趙希昔希得與交三人則燕王之八代孫冀王惟吉之七代孫淮陽侯守約之六代孫贈洋國公世綿之來孫博平侯令虛之元孫武節郎子儒之曾孫伯王之孫師必之子希得其弟四第與交其子也自何世遷合則無得而傳矣孟壘於希昔等皆疏屬以行輩論則為族孫自以文學崛起田間登開慶元年己未科周震炎榜進士第循例為金華尉景炎元年陳宜中張世傑等聞德祐帝以臨安降元同奉益王昞即皇帝位于福州府遙上德祐帝及太皇太后尊號孟壘及其從子由鑑懷太皇太后帛書間道來上森楷案宋史宗室世系表孟壘下無從子輩名而燕王房少師昌國公世直系下八代孫有由鑒名當即由鑑然于孟壘相

距在十世親屬已疏例不得傳其從子而世高七代係有孟壘為其倚
之子希怡之孫師距之曾孫伯韓之元孫子琮之來孫與由鑑同祖襄
國公令禩則四代以前為同胞也雖已為無服族人較之秦燕分房猶
為親矣疑孟壘本作孟壘與本房燕王裔同居合州有事互相提挈尚
在情理之中然傳作孟壘必舍表之孟壘而以由鑿故改從表之孟詔
壘殊覺單文孤證未足為據今仍舊作壘而存疑于此以備參攷

擢孟壘宗正寺主簿使出監軍攻元兵于明州克之遂復明州俄而元
兵還攻孟壘出戰敗績見獲元將誘說之百端終不屈被磔以死宋史

世系表忠義劉士昭附傳續通鑿寇
宗重慶府志張程合州志關今補

蘇孚陶舜臣並州人以諸生有重名相友善明嘉靖末白蓮賊起所在
殺掠人民孚與舜臣同奮大義起鄉兵冒矢石親討擊之戰敗為賊所

殺州人悼其義祀之忠義祠張乃孚
合州志

董盡倫字明吾州北虎頭寨人明初特封萬戶孝文裔孫也孝文自有
傳盡倫世承門業讀書修行中萬曆十九年辛卯科舉人除陝西清水
縣知縣有惠政調知安定縣秩滿當去安定人詣闕奏留特詔遷鞏昌
府同知仍留視縣事久之以同知理甘州軍餉以清慎聞事畢解歸天
啟元年奢崇明反率眾薄合州城人情洶患盡倫先聞其事已鬻產募
鄉勇率子弟入城以鄉官偕知州翁登彥登陴固守賊遣投降吏目蔡

合川縣志卷四十七 鄉賢六

琛往說之盡倫怒手刃琛抉其睛啖之示必死賊選鋒來攻盡倫出戰
大破其眾賊走城以獲全銅梁知縣吳宏業被圍急飛書請援盡倫復
率兵往破賊銅梁城下賊解圍去由是盡倫能軍之名雀起巴合間矣
未久巡道徐如珂檄盡倫領兵直擣重慶盡倫奮不顧身率鄉勇千餘
與守備金富廉沿江下以除夕抵江北祭告先死事諸臣直薄佛屠關
賊見孤軍無繼誘令深入伏兵四起盡倫盪決衝突殺傷過當終以眾
寡相懸力竭戰死森楷案劉時俊渝城功罪紀畧作鄉官董盡倫與
賊相持云云與此情形略有不同今參用朱燮元恢復重慶紀畧時天啟二年正月朔日也賊雖幸勝
然受創已甚從此嬰城自守不敢出郊遠掠亦不復萌東下計矣事聞
詔贈光祿寺少卿森楷案合州志無少字世蔭百戶建祠奉祀人心因此益奮加
以忠憤屢有斬獲不久賊遂破平榮昌劉時俊等傳其節義無雙推為
功首特詔改蔭指揮僉事以子三知襲職三知慷慨激烈饒有父風領
父所部兵倉風宿露誓不殺賊不休翁登彥舉于當道使督兵屢有戰
功崇禎初復追論盡倫全城功改蔭三知錦衣千戶後張獻忠亂諸生
董克治拒守不屈殉難于長安坪亦盡倫族人也先是克治以名家子

爲州學生相貌魁梧志氣慷慨見者欽重獻賊既破重慶旁掠所屬州縣將至合州克治聞之遽傾家貲募義勇殺賊甚多賊不敢肆論者皆稱其有孝文盡倫之風克治亦自命必繩祖武不貽先人羞也久之遇賊于長安坪相與激戰力不能支率民兵退据洞中相持月餘賊不能下乃鑿山積火其上以烟薰之凡三千餘人○森楷案一洞安得容三千餘人且安得有二千餘人之糧相持月餘也不近情理疑當是三十餘人以少拒多月餘不下斯爲奇矣千當爲十之誤然他亡左證未能輒改而辯正之于此皆感克治忠義無變志求出者遂同被薰死清乾隆四十一年追喪勝朝殉節諸臣詔入祀忠義祠明史忠義董盡倫本傳宋變元恢復重慶紀略劉時俊渝城紀略勝朝殉節諸臣錄黃廷桂四川通志張程二合州志寇宗重慶府志

陳彥韜州人驍勇善技擊而多髯時人稱之陳韜鬚子嘉慶初教匪起彥韜年六十矣奉州官札練鄉勇禦賊嘗帥眾百餘人擊賊于明月寺大破之獲賊三十餘人賊爲膽落不敢窺其境彥韜愈益發舒因出兵討賊所向有功賊益畏而惡之欲得而甘心焉三年八月探知賊將由墊江分趨鄰水江北入寇州境遽率數百人扼守得勝埡爲堵禦計寂然未有聞一夕爲賊所襲猝不及戰被執去羣賊將殺之賊目惜其材

合川縣志卷四十七 鄉賢六

武欲降之使爲己用牽率至大溪口遣人誘說百端終不從且罵之乃殺之剜目屠腸以死慘甚後有人往過猶見其鬚在門限深入寸餘鬚上指蓋卽其殉難處也事聞詔以軍功把總廕錫並崇祀義烈祠張

孚合州志晴雲山房苟文燦傳點紅萬緣山房王大造傳東里訪員投稿

苟文燦字月邨州西里白沙場人嘉慶三年以諸生距賊于文家埡兵潰死之馮鎮巒爲其傳曰君性簡傲形短小精悍雖弱不勝衣而頗負奇氣遇人鮮所當意理有未信尊親前亦必力辯不稍屈少學於其叔毅齋先生門讀西堂尤大史見危致命篇慷慨悲歌聲振山谷嘉慶元年九月達州逆匪徐天德叛君憂形於色語其友曰合與廣岳接壤實爲重夔上游賊苟乘閒而圖我謀之不早茲地壞我輩將安所稅駕二年十一月賊果大至踞包干寺分其黨暗渡羅紅渡逼丹溪口及三層巖蓮花溪沿過鄰水界擾九龍場進窺潭子壩將由獅子腦復犯合境斯時人心憤怒財力贍足各鄉齊練團勇志期克敵定遠則有李繼昌拒賊於羅渡溪丹溪則有姜正道拒賊於石龍場蓮花溪則有陳彥韜擒賊於明月寺川主廟則有彭大文獲賊馬於三層巖而明東舉人劉

仕欽督率十八團鄉勇扼賊於獅子腦君方以歲試自渝還倉卒聞警樹旗幟募義勇權發社倉刻買金鐵器械糧餉畢備遂渡江進援賊不敢入吾合不親賊匪之害者幾一年皆賴諸公奉州刺史命以圖功而君則志全桑梓苟不殲賊不已者也君居地白沙場界明月里東西之閒賊逼東則援東逼西則援西雖心腹內地關繫實與邊隘等三年六月賊擾廣安刺史阮公以唇齒義求援眾奉龔使君命同往濟師維時荷戈者三千餘人君與李公繼昌以三百卒堵廣安之恆升場獨當一面鎗藥大作聲聞數里賊驚稍稍引去一時難民萬眾竄至城堞下門閉不得入哭聲震天君爲撫綏久之八月賊由墊江來過長壽鄰水復擾江北逼華蓋大山下勢將越險入寇明東大震陳彥韜以數百人守得勝堦失利被賊死眾士逃亡惟劉孝廉猶據桃子壩而要隘旣失賊入內地獨力難支君聞信激發刻卽督眾往有勸之留者不顧難民絡繹路途嘖嘖稱嘆謂此時乃有此人卽呂過江三十里宿水口寺與劉會越明傳集鄉民軍威稍振師進次大溪口復次石佛寺轉屯獅灘橋雖未與賊馬交斬賊閒諜數人時賊分前後隊來我師或壁其後或扼

其中是役也極力撐支者八日明東不至全陷鄉人至今猶能言之然亦瀕於危矣合邑全勢明月里居一州之半間以宕渠水謂之明東東西自蕭家場截過沿口橫亘一帶左嘉陵右宕渠兩水合抱如孤嶼江中與明東實爲左右臂若傲兩河壩而守以全師攻其後道必絕故連年賊不敢深入至東事壞而一望平原可進可越賊遂得以長驅西事亦危方明東之陷也大兵繼至姜參將敏功陣歿楊家巖富劉白三總戎師屯三匯壩君單騎謁營門獻策曰事尙可爲也大人能分兵三隊一由水路疾趨踞釣魚城石子山一抄出賊上截石佛寺大營壁於三匯以老弱者守並飭河西沿岸巖堵選敢死將士分途殺賊生本境書生頗識地利願督率義勇前驅賊無多人可一鼓取勝不足平也並手畫形勢於地以進時諸總戎兵不欲分雖善之而終不能用十一月箕山賊復據構梅場進奪飛龍場月之初二君方與諸紳士議集大團於青巖寺維時明東旣失人心不固諸公方慮倉卒無以集事也聞信色沮君獨奮然曰事急矣募士輸餉諸公任之予已辭告先人墳墓來矣否則舍此更無全策遂嚴裝束策士氣初發鯨魚場繼與定遠繼昌李公

分路進堵李屯新場君壁鼓匠鋪初八日李公輕騎覘賊於伍家巖賊至死君與賊相持高石坎屢獲勝聞李公死恐出賊後遂由新場截據沿口以牽賊勢十一日聞賊已踞賽龍場將逼蕭家場蕭家場者廣岳入合門戶也君急移屯佛門坎十三日趨蕭家場進扼文家埡口度敵不敢由衝衢陣於間道以待己而白巾遍野豕突狼奔遠聞胡哨聲起木葉皆飛眾士股栗腹心士促之曰走賊兩路環裹而來遲恐難出矣不聽所乘肩輿纍重棄之徒跣走陣結鎗炮初發時有他團新集鄉勇見賊大至先潰環山走眾師續潰君猶不欲還回顧更無多人有傅某負之疾趨賊已及中刃色不變辭不屈遂連搦之身中數十刃洞胷穴臂氣絕屍橫大榕蔭下先是傅某者素無賴鄉人欲誅之君待以不死後屢得其力至是亦死同死士三十餘人當是時也分左右翼以拒賊賊必退否則跳而免留身有待未爲不可而君死矣死年三十七君御鄉勇嚴而有恩故急則負之同死尙三十餘人然於事終亦無濟初諸公集議青巖寺予時在座君酌議十條皆詳確可行予曰今之事宜分緩急能次第振理明東團事然後可以持久否則先後必敗君爲人負

氣使性意見多與俗不合於其死也詆諆者眾有謂不量力者有謂薄待鄉勇者有謂自取死亡者然自君死後門戶旣決眾團解散更無一人擊賊賊屯蕭家場破佛門坎走雲門鎮縱橫數十里所過之地焚燬殆盡碧戶朱門煙霧滅甚至放火殺人淫掠士女迄今過故土而憑弔山川草木觸處沾衣感遭逢念昔者拈筆之際淒涼滿目也君嗜古能詩所著半耕堂稿藏于家妻氏覃善事姑嘗割股療其疾子培藝字

子六州學增廣生

晴雲山房文集荷氏族譜

王大造名朝元以字行州東里小趕漕人嘉慶三年從參將姜敏功拒賊于楊家巖兵敗死之張乃孚爲其傳曰君生有膂力善騎射乾隆四十四年入州武庠性慷慨任俠在鄉里每爲人排難解紛受勞怨不辭嘉慶三年九月達匪徐天德肆虐賊黨張漢潮以數千騎犯合境君拒戰于楊家巖死之方賊之蹂躪廣岳也憤然謂鄉人曰吾曹忠義自奮可束手待斃乎乃出貲財募鄉勇練團豫爲防堵計二年十一月賊由理民來勢甚鴟張君偕苟文煥陳彥韜奉州委扼岳理鄰三界之龍泉寺大面坡以逸待勞賊聞風下竄而次年八月陳彥韜被陷大溪口屠

腸剝目灼鬚髮皆燼死慘甚君聞怒髮上指以劍斫柱淚泫泫下當是時官兵多虛爲聲援觀望逗遛君雖目擊心傷誓不與生無如所督丁壯未經訓練不可以戰徒付悼歎而已自丁巳迄戊午賊去來莫測君亦奔走疲憊無甯時蓋君家在渠河之東與廣岳接壤縱橫百里間烽火相望一日賊不滅不能休也君之死也有富總戎由夔府尾賊來合駐營三匯壩之黃草嶺賊復下走焚掠所過場鎮官兵不敢發君踵軍門請見曰賊驕淫已久不以我兵爲意若能據險乘其懈擊之可一鼓而殲也倘蒙委任願爲導總戎壯其言乃命參戎姜敏功暨州防汛把總張茂雄率兵六百君領鄉勇二百人先之鼓行而前將至楊家巖營未列賊眾猝至蒼黃接戰時大霧彌天日慘風號銃炮劍戟聲交撞相持自辰至未勝負未決忽胡哨四起張左右翼橫衝我軍標斃數人鄉勇驚潰官兵繼之遂大敗君謂姜曰事急矣公乃朝廷命官不可辱吾當捨死殿後衛公歸姜領之數上馬馬逸不可止旋墜爲賊追及先遇害君亦被圍數重力鬪氣竭身受重創死兩人屍撐距僅隔數武耳惟張以馬騰越跳越賊頭過而獲免嗟乎使能早據楊家巖以高臨下尙

未至於敗也是役也官兵死者二十一人鄉勇死者十有三人而是月團首歐萬鵬與賊戰石碓窩被執罵賊死後兩月文學苟文燭拒賊文家壩潰敗不屈死事後俱邀卹典入祀義烈祠君死時年四十有三妻陳以哭夫喪明一月卒其女以哭父母亦喪明凡五月卒里人哀之以

爲節孝出一門云

點紅萬綠
山房文鈔

劉鍾鎧字廷碩州東里人嘉慶三年拒賊于長坡嶺兵敗死之張乃孚爲其傳曰君祖國聰自楚南遷合愛松木嶺山水奇特遂家焉父應爵有操行能文章試輒冠軍不售賫志以歿生子二人君其仲也伯兄早世方五歲時教以句讀爲講忠孝大旨頗有悟長應童子試州府俱列前茅學使擢第一以國器期之少負氣節讀書愛談古人奇節異行諸軼事當快心處每浮一大白而所居又鄰華瑩大溪益以盪其心胸作爲詩歌聲出金石聞者壯之嘉慶二年白蓮教匪滋事君奉龔州牧札諭各衛桑梓首倡捐貲製器械鎗炮招集鄉勇設立卡隘防堵維嚴是冬達匪王三槐率醜類數千由岳池焚掠廣安包千寺一帶欲窺合君聞警親督子弟鄉兵糾合各團齊赴三層巖拒之賊知有備遁去至鄰

水攻城不克下竄罈子壩君復趨華瑩山各隘堵禦賊卽退三年秋賊由梅子埡竄入時陳彥韜先已陣亡眾團膽裂潰散不復振惟君不異初志誓不與賊俱生率本團退保康家坪殺賊數人獲報馬二匹賊不敢逼冬十一月賊魁徐天德由五里坡入燒涓子溪君督眾迎戰不意賊黨張自聰等突由賈角山趨坪以分其勢當是時腹背受敵鄉勇盡力死鬪殺賊五六人而寡不敵眾良璞及李福四人均被斫死君入重圍身受重創不得出被執至桐子園賊餌以偽爵勸令降君不屈且訶之曰聖天子當陽汝曹不早自湔洗爲良民顧乃作賊須臾王師至盡殺汝曹矣賊怒遂遇害時年五十有七未幾賊遇大兵撲滅無遺如君言子良駒諸生稚弱口訥未能爲其父表揚以致卹典莫及今奉大府檄纂修通志廣爲採錄其姪良聘從予遊偕良駒以其狀來請入邑乘至君居鄉時孝友好施皆有足取茲撮其大者乃爲立傳論曰君之死也有同里被擄者逃歸言君死狀鑿鑿惜無人報聞使大節黯然垂十餘年然則千古義烈奇士其於身後益亦有幸不幸耶

合川縣志卷四十七 鄉賢六

七

點紅萬錄
山房文鈔

徐舉桂字芳周州東里三滙壩董家河人少讀書通大義尤好談忠孝節烈事每至臨難致身處輒低徊往復傾慕久之長老咸歎異焉嘉慶三年達匪竄擾州境鄉人皆恐舉桂獨謂無患旋率鄉勇百餘人長驅賊巢擬一大創之使其喪精亡魄不敢復相窺伺而眾寡不敵遂陷賊中賊欲招降之不從反叱曰爾曹逆天不道荼毒生靈王師至無遺種矣我肯從汝族滅乎語畢仰天自刎死賊歎服其忠義以土掩其屍去因子幼未具報遂無知其事者道光九年墓圯其子重修之乞其姻家雙流縣校官張恒爲之墓誌銘表章其死事狀世乃稍稍知之然竟無人爲上聞請祠祀亦缺典也今具錄其事爲表章資焉

東里采訪員
徐光昭投稿

熊榮揚州永里人父興明官

榮揚幼隨父之任讀書兼習武

藝因通太公孫子兵法饒有膽識以預辦防務有功保舉千總職銜達匪之亂奉父命率兵至州城遣諜探知賊在涪江上游劫掠遽命從父弟榮忠督兵前驅已率正隊後繼榮忠擊賊于遂甯之雙江鎮破之且戰且追至射洪界不見賊登高望之見亂山中旌幟四散人眾無多策馬進時從者分道覓賊蹤散未合方行數里賊眾大集榮忠勢寡不敵

且山路崎嶇不易得衝突出遂戰死所部殲焉榮揚聞之誓不與賊俱生亟驅兵進戰賊潰不能止遂躡追至潼川三臺縣之下游聞賊方集隊圍潼城垂破而總兵某在上游畏不前榮揚遣健卒從間道往約與腹背夾攻自選精銳先發其餘繼進夜將半榮揚向府治後山行遲明近三臺山令軍士急造食以待後至者坐頃天陰霧沈沈榮揚知景象不佳嚴陳待戰俄礮聲震山谷賊四面至眾欲負之逃榮揚曰是何爲潰者斬語未卒賊環攻矢礮並發從者皆死榮揚長歎曰天也夫命畢矣遂面北再拜自刎死移時猶挺立如生賊怖不敢近至有向之羅拜者事聞廕襲雲騎尉年給千總糧卹其家榮忠父興仁興明兄也榮忠幼隨興明入伍以仁厚得軍士心每戰身先英銳弈弈積功至百夫長奉將軍德榜泰令同渝綠營兵分守沿江要隘相機進戰及死榮揚亦亾遂無以其事上聞者同死者若干人亦莫得而詳也永里采訪員投稿

擬醉後赴急流葬魚腹中友人或知之強拉以歸爲釀資送還州僅得不死一日飲于他所有來告以書屋遭焚者正值其酣適不願奔救徐張白眼問曰火勢如何曰大甚曰如此大火恨不以酒賞之卒不去嘉慶二年設館于雲峰寺之鄉間與劉泰三歲貢倡和泰三戲贈以詩有東西南北無歸路三萬六千有醉場事到窮途多白眼年同厄閨在黃楊句光渭得詩大喜謂狀我甚善而不解黃楊語何指大致惜其不進而退也未久達匪窟境掠之去見其高談侃侃無所屈撓異而善遇之至一廢寺中向匪索酒賊予之飲酣復向賊索菸葉賊不時予光渭瞑目罵之曰賊奴擄我來不供給我行見汝等皆斫頭耳賊怒刃之立斃里人聞而哀之泰三前詩乃成讖矣張乃孚曰映璜日在醉鄉中惟知有酒不知有人并不知有身今亦惟酒是求且不知其爲賊也者卒罵以死死得所矣使其早三日沈酒以戕其生豈得爲映璜豪哉因作詩以傳之詩曰慷慨都成斫地歌幕天席地復如何而公善罵非關酒半爲看人白眼多不是登徒是酒徒瓶中長恥宿糧無最憐載月龍門浩幾效投江楚大夫茅屋三間付劫灰身無長物但啣杯一言絕倒談諧

甚酒賞咸陽一炬來索酒麤豪膽氣存目中無賊勢將吞祇今露布需

才日一盞何人醉墓門固紀其實亦傷而惜之也問濱餘草硯農詩草東里采訪員投稿

熊金璽字玉福州永里南漕人性孝友父均德以為才委之家事一切

置不問金璽每有所作必稟命而後行弟年尚少金璽愛之篤不忍累

以家事致讀書無成亦尺布斗粟皆可稽核曾不以一毫自私利也嘉

慶初達匪擾境奉札辦團多與賊為讐賊平後又奉命搜餘匪有生殺

權得匪則誅之無倖免者匪嫌之次骨十五年秋遇匪于老衙門被刺

死既死之九十年里人歲貢李順受為其家傳曰公自為童子時已有

超邁不屑之概謂科名可立就稍長憤家事為強族所扼常鬱鬱不自

得遂輟讀及涉世事重然諾矜名節有仇直聲久之能名播州里間凡

司牧是邦者無不以艱鉅任公公遇地方重務他人處之不能出一策

定一謀及輾轉圖之而百計不就者公至如以秤量物以治陶金靡不

條分縷晰範圍畢具以故當事重公賢公自以受當事知弱者扶強者

鋤善者譽惡者鄙不以私情稍徇而宵小之嫉公者遂滋矣然畏公能

感公賢不能愬之于公廷又不敢排之于庸眾遂委曲彌縫其間因以

合川縣志卷四十七 鄉賢六

化鴟鴞為鸞鳳者比比矣如是者有年既而達逆肇亂蔓延數百里我

境亦有賊蹤將軍德榜奉命剿辦分合州地為上下兩防以下防委

公督辦公晝夜籌畫指示各隘機宜有要事則親身周歷密授方畧不

假手於人賊憚不敢至至輒敗我境之未被賊者無不以生佛頌公一

日公方履隘查防將軍忽夜至促召公公未至將軍怒甚禍且不測公

至侃侃談機要語未竟遽命公坐飲公酒欲授公職辭不願公出以輜

馬送公歸而公辦防之名於是著矣如是者亦有年賊平後餘黨匿林

巖間晝則伏處夜則剽掠我境地處山中複嶺層巒綿亘數百里匪輒

視為逋逃藪定遠巨匪周某潛居壁合山界中匿匪漁利民甚苦之當

事慕公能遽任公以生殺全權公既嫉惡如仇不可以私干而又團綱

整肅無倖免者匪遂欲甘心於公而公一以鋤暴扶良為己任無所屈

匪計無復之初劫公於家不果繼劫公於途未遂或勸公辭職以自安

公意謂人安則得天佑而已亦安不聽且曰若輩殃民法當除吾嚴待

之亦子產水懦火烈之意人生斯世達則為生民造福窮則為桑梓捍

患何鯁鯁慮為十五年秋匪遣其徒于宅外數十里之老衙門路伺公

公適獨以團事經此匪猝出刺公傷腹公固嫻武技脚踢匪十數步外且鬪且呼團眾集而匪去公遂賫恨以歿時人痛之爲請于大府得贈鄉善二字榜于門公歿時戒子孫勿復預公事今世風靡靡其子孫雖貧而鬻序接踵淡泊自甘不隨俗習變遷者皆公厚德之所貽也子以文自有傳後百餘年更有以辦團鋤賊爲賊暗殺者有李鴻賓游雅三杜向榮等數人今最錄之李鴻賓名四知字新銘州東里三滙壩人性剛直嫉惡如仇方滿清末葉政教廢弛地方土痞往往與外匪相勾結恣爲奸盜鴻賓時被舉爲里正知其將爲鄉人害密稟痞棍某某悉寘之法仍請于當道興辦團練與各里聯合互爲聲援偶有匪竊發無論遠近鴻賓但聞知卽親率操丁跟追截擊務獲乃止如吳玉成事犯本州而逐捕至江北其一端也又嘗深入匪首某巢穴獲其魁送公署懲辦無漏網者前後凡禽誅匪渠十數鄉里肅然惟鴻賓之力爲多然匪黨由是恨之切骨思刺刃于其腹中已非一日而無隙可乘訖不得逞民國二年討袁軍起南北騷然今四川督軍熊克武省長楊庶堪亦起義軍淪中而勢薄力單不得不招納凶命藉壯聲威匪黨遂得濫廁其間假借義軍名目殺人報仇無所不至鴻賓時寓居城中見招安軍虜至多舊時宵小豪惡將不利于己頗岌岌自危擬乘間逸歸鄉里避其鋒而隊長周際平故嘗充府中校體操教習與鴻賓有舊州中社會黨魁某又力言若輩利得錢耳誠出千金散之當無憂否則隨在皆危險不獨城也鴻賓以爲然如其言畀以金既議定不相害矣俄而際平受命攻順慶拔營去其後隊某某仍拉鴻賓行社會黨魁某在座瞪視之不能救也鴻賓行至城外十里之鋪山埡遇害年三十七子懋江北中校畢業生游雅三名文儒字席珍州西里龍市鎮人性粗豪能武斷鄉里以其勇于任事推充本場鄉總光緒二十八年以率丁追禽匪徒魏海波等十餘人于馬頭溪有功由州稟請總督外獎六品銜並賞團丁銀三百兩三十年舉任龍涑鎮鎮會總董倡設高小學校一所

森楷案龍涑

鎮高小學校原設象鼻寺係楊思炯等私立非雅三倡設也而來稿云云蓋改私立爲公立自雅三始與當再詳攷

又于校園植桑數千株作公用爲實業先導創修本場保甲局爲議會辦公地民國初元西里哥老會徒借同志會爲名恣擾橫行遠近震恐雅三協同州紳所在設備得以無害時雅三有族子某爲同志會頭目禁之不可事

定乃捕送公署請懲治官爲收繫年餘乃釋未幾雅三自鎮夜歸爲人鎗斃于路并斃其長子光富時民國二年九月朔也縣以其事上聞令撥本鎮公款建專祠以勵後之正直辦公者聞以乏款今猶未果云杜向榮字尊三州西里蕭家場人清光緒中入州學旋補增廣生聞省城新立法校有名譽往受學依期畢業還被舉爲縣議員常以提倡公益開通風氣自任民國成立土匪蠶起向榮以其場爲合岳交界處易藪奸倡辦合岳籌防公所集同志數十百輩辦團自保一鄉以安而匪等特惡之三年七月夜中爲匪首楊從雲等槍斃于場之保甲局錢物一無所掠而去其爲讐不爲財可知已議者猶謂向榮素行不謹有以致之亦不成人美也今具述其事而不下斷語一字俟後來者論定焉餘

蔣祥卿滕章第等無他事可說並見民獻譜永里東里西里采訪員來稿

劉敷譽州人以文學爲邑庠生家貧課讀自給妻死無子遺二女敷譽教以古來令妻賢母及貞孝節烈之事皆聽受無違父女因以相依爲命達匪之亂連年播遷流離幸得無恙嘉慶七年餘賊猶蔓延未靖敷譽不敢甯居率其二女沿途避難俄而賊至被執二女俱誓死不屈敷

合川縣志卷四十七 鄉賢六

譽亦不忍其終受辱遂俱罵賊同時遇害程業修合州志

苟鍾驥字占魁州西里白沙場人雲龍六世孫也父培縉母氏陳爲故武舉一清胞姊武進士王堂從妹皆以材勇馳聲鍾驥生而似舅故亦狀貌魁梧雄毅天成雖嘗讀書受學非其好也少長從外家操弓馬應武試連不售去隸重慶鎮標中營爲步兵時張玉良在營彼此談論相得旋從征粵逆鍾驥與張率十餘人歃血訂盟結生死交抵南京投欽差大臣向榮麾下奮勇出力屢立戰功由站馬糧得把總陞陞千總賞戴藍翎榮知其才堪重用撥爲內幕護衛左右不離鍾驥以榮年邁兼病目一切檢點營務晝夜隄防事無鉅細悉任之一夜賊擁大隊突入營壘軍士潰散直搗中權榮倉皇失措鍾驥見事危扶榮上馬兼懷帥印奮力衝突且戰且走身被數十創榮得出險幸免而鍾驥受傷已深竟以是役歿時年二十九歲苟氏族譜程業修合州志

向元吉州城北人年甫冠投身重慶鎮標右營以馬兵隨征粵逆奮勇爭先每次殺賊奪旗蒙保儘先外委賊竄長沙旋擾武昌繼又由九江攻陷江南元吉跟追屢立戰功取回縣城十餘處蒙保免補外委以把

總儘先拔補嗣經奉派援皖援浙節次出力累官至儘先參將加副將銜賞幹勇巴圖魯名號後于咸豐十年八月在寧國城與賊接仗城陷被礮陣亡時年三十二歲廕雲騎尉子

承襲 程業修 合州志

文有守州西里太平場人咸豐七年往投湖北軍營奮勇爭先屢獲勝仗克復黃梅賞七品軍功九年調赴湖南剿逆匪石達開賊圍寶慶督勇往援殺賊首數人奪大旗一桿身帶重傷蒙保薦以把總儘先拔補賞戴藍翎十一年駱秉章奉旨督蜀有守隨隸黃涪熙軍回川歷在定遠縣二郎場等處與賊接仗尤為出力以涪熙死緩不得賞同治元年石逆攻陷長寧因爭先上城受刀傷城賴以復保奏以千總儘先拔補四年又奉調往敘南防剿滇黔各逆值賊攻破貴州正安聞警往援血戰陣亡時年二十六歲事聞照千總例賜卹銀二百兩雲騎尉世職胞弟有成承襲

程業修 合州志

朱廷周字蘭亭州來里尖山場人咸豐七年由州團練教習從征髮逆入西安大營管帶蜀軍彝字新後營身先士卒屢建奇功陝甘總督左宗棠屢次保薦參將賞堅勇巴圖魯名號嗣因剿賊賊潰跟追數百里

合川縣志卷四十七 鄉賢六

直抵賊巢地名金雞紅羅舖親冒矢石攻破之賊走復窮追中礮身亡時年三十一歲賜卹武義都尉繼胞兄子開龍開鳳為嗣現在固原提督標下辦事所謂現在光緒初也後遂

不可攷矣 程業修 合州志

劉萬朝字保臣號卿偉州興里五尊堂人幼讀書通大義投筆習武屢試不售乃應募從軍咸豐十一年賊逼州治萬朝隨知州郭京桓盡力堵隘奮勇守城賊退由義勇投効四川提督胡中和麾下進剿敘州遵義各處軍務以勇敢有勞獎給五品軍功同治四年保薦守備銜後投効武字營提督周達武擒逆賊於鐵山屢著戰功洊保都司五年隨攻寧遠保升遊擊六年三月剿越雋夷匪打仗陣亡於橫山瀘水溪棺寄寧遠西昌縣統領申文請卹經總督駱秉章彙奏奉上諭追贈參將銜給子雲騎尉世襲罔替入祀昭忠祠

興里采訪 員來稿

張化珍州來里永興場人性慈惠好施與凡救難濟急諸義舉知無不為而艱于子嗣年三十膝下猶虛其父母又急欲抱孫屢命納妾以伉儷篤謝不從父母乃陰託媒灼密為選擇得祝姓女已定期迎娶矣化珍謂抑良家女子妾媵意不忍婉請于父母卻其婚並為祝女擇婚助

粧遣嫁時人嘖嘖義之後其妻連舉丈夫子六長春芳次聯芳相繼入
邑庠餘亦誠篤能守成人皆以爲好義之報

程業修
合州志

張正常字芝宇一號紫腴州興里思居舖人以光緒二十四年卒舉人
丁樹誠爲作義俠傳曰史記游俠傳引韓子云儒以文亂法俠以武犯
禁犯禁則不義矣俠何以稱焉俠之可稱義以爲上然俠而義者蓋難
其人今乃于吾友張君芝宇見之君故捐中書科中書銜濁世翩翩
英發秀美性警敏洞達世情一步百計工口辯談古今事滔滔如懸河
待人有肝膽好雪不平鄉之良弱咸叨捍庇遇強暴有勢者輒與角必
挫其銳而後已下筆刻摯詩文有奇氣屢戰童軍不售遂遁入刀筆藉
以攄其縱橫之氣憑其筆舌震懾一州然依理捉刀有乖理者餌以巨
金弗屑也爲人放曠不拘歌童舞妓日羅於前而沾染者鮮復通輕俠
朱郭之豪以意氣相結納而隨事進規陰相箝制三峽之匪不敢公然
倡亂張之力也平生俠烈事難覩縷就可知者舉其大凡州興三費廳
署例不受訟猶藉軍犯名開小典就中抽利年得數百金張知其弊持
一瓦硯要典百金不許遽稟大憲封之廳乃降心關說許其所取息每

合川縣志卷四十七 鄉賢六

三

千少六分之二乃復其典焉州設六政局委董經理濫紳鑽其中侵虧
不少累具控而官紳相倚多調護之甚且公局重地居然挾倡聚賭適
成穢墟張蒿目刺心久欲整頓之未得閒也有局吏與董構隙竊簿賬
示之指駁多條臚稟州牧牧與局結一氣擲不耳轉遭媒孽被以訟棍
名捕治之張潛逃由府控道觀察姚公有能名放告問詞張口陳局弊
佐以賬據計蝕二千餘金姚謂之曰局與官相比周今署事徐牧初到
爾州此人倔强不受請託吾將案批回外達以書必不左袒急回候審
可也張歸投審局董預謁徐公彌縫案事且斥張狡當懲刁風徐已得
道書佯許之次日懸牌堂算大動聲色囑幕中人監之侵吞事實立飭
諸董分償賠千餘金押繳之六政弊竇至此一清董有戀棧者張故持
竹策驅之亦快事也然義聲卓越尤在張綏之一案綏之與張不同宗
少聯蘭譜氣相投也粵匪亂綏之投鮑超軍積功至參將職娶某氏婦
有姿浪迹江湖從良嫁綏之住州有年越南之難鮑奉旨出援札調舊
將綏之隨往得鮑意派領親兵隊至雲南界和局成撤兵返黎都司者
鮑戚也犯軍法鮑欲斬之屢矣保得釋疑綏之進讒心忌之返至桐梓

縣之士庫驛暗嗾前隊殺綏之於道奪其裝囊詐稱散勇劫去時鮑已抵瀘州聞變急命營官回究其事不知黎所使也數日內捕勇二三梟首塞責鮑憫其死殮屍停旅館給喪費百金移文來州飭親人搬柩其遞文之卒爲綏之舊人知其寃以黎勢大不敢伸雪至州白情皆謂劫犯已正法雖黎主謀沒奈何矣張獨怒髮上指願爲伸屈借綏之婦某氏往投詞鮑幕訴寃狀兼引某卒可質鮑大怒以張好事不受憐乃坐虎帳以軍禮見之侍衛森森刀光林立呵聲如雷震氏與卒俱汗駭不能置詞張乃伸眉張膽陳綏之寃可證者三軍裝行李同黎上道而黎裝無恙一可證黎去綏之一里程得劫音觀望不前二可證勇犯臨刑時猶罵黎嫁禍捉人填坑三可證又有某卒目覩其狀此活對證不可脫也如不昭雪當上叩天闈恐軍門難免縱容之過抵掌直談侃侃不撓旁列營官多員交口詰責俱莫當其鋒鮑爲動容許查確根究遂退授意營務處爲黎調停夜傳張到幕軟語慰之張不搖乃暗斥黎賠數百金託名優恤拒不受屢次轉圓加至千二百金又爲張保五品銜報部選用猶不允氏與卒志得願滿轉勸之事始了張入謝鮑獎之曰爾真奇男子其舌鋒之利如酈生憑軾可下齊城恨相見晚後有出山時當延作軍謀也當兌金封舟護送張在舟與氏各一艙界限極嚴氏素履不端德張獲巨款欲以身報百端獻媚張正色拒之及抵州防氏浪費帖邀綏之親黨爲抱子憑眾點金交脫合遞交領狀在州存案惟規收路費七十金以外不染指可謂去來清潔不負死友詎意金入氏手句通狂狡如蕩泥沙未兩載金遂罄欲重翻黎案張執不可氏乃易德爲怨聽姦夫謀控黎督轅反噬張以賣命蝕金等情株連得准提張赴省措辦訟費百方典當幾傾家訊於發審局審官查卷宗見張與氏交領狀知蝕金事虛又得鮑札文爲黎開脫讞數次釋張歸淹省半年矣代友雪寃仗義受累旁觀大不平張豁如也有友謝爲德遭家變晚母主內政握其租典多外漏謝不得干如孳子然張爲哀控經官和解得母子如初有翁某本趙姓出抱翁家生二子一還趙宗一承翁祀臨終時二子俱稚建支祠託友經紀逮子成立友踞祠久不歸張爲代控乃完璧歸趙州城外立駱公報恩二祠棟宇抄聯點綴亭臺花木名勝區也而駱祠無餘款報恩祠祀私家宗祖不合例張上稟得撥罰項作修

補復醵金成會祝駱公生辰又移釣魚山余冉諸木主祀報恩之正寢
各姓私祭龕列左右俾之公私得所渠口渡爲嘉渠合江處水漲時如
天塹過渡維艱里人合捐千餘金交王某辦義渡王私諸橐渡仍廢張
仗公憤稟之斷王償金始成義舉諸所爲皆符公理非一味血氣用事
也以負公直名州中事多倚裁決張亦抖擻精神不憚賢勞每日口答
辨難手應箋書無一寧晷張熙穀知州時奉憲札練義勇抽豬釐作餉
屠行多桀鷲提刀鬪很久抗不承公知張能幹事委辦之日夜與屠首
調和歷數月事乃戢而張已脣焦舌敝矣得啗疾出話無聲有友獻一
方攤大紙膏貼其背肺竅通得復元逾一載抱小恙歸家調攝予欲視
之先達音張還書言恙漸平勿勞枉過遂止未十日遽騰凶耗蓋病根
種前日一脫遂殂悲哉時年四十有四歿之日祭弔者數百人皆夙受
其蔭者予挽以聯云君負不韙之名少是情癡長爲義俠晚作直齷鄉
紳在落寞風塵外早訂神交從茲文酒流連遂結同心契我抱太乖之
運前喪令妻繼以愛子今又失親密良友當輾轉牀褥時猶通音訊何
意道途咫尺竟無見面期實錄也配高氏無子舉二女適定遠兩大姓

合川縣志卷四十七 鄉賢六

五

一熊竹勳孝廉一王大令長子張兩納妾皆不育繼姪孫承祧家無儲
蓄餘舊產足衣食而已今有公事不辦與良懦受欺者猶眷念曰張若
在不至此仕隱子曰芝宇爲人慷慨多智略遇事敢爲筆舌又足以濟
常以抑強扶弱爲事則誠俠者也然持以正軌於理心坦坦無偏私與
世之專重然諾不顧是非者迥別又俠而義矣故以義俠名篇冷雨幽
窗一披讀之芝宇死而不死

仕隱齋
涉筆

吳瓦匠逸其名州東里石龍場人父母俱亡惟一妻相與穴居石窟中
蓋貧而無力賃屋也性戇直不苟取子業精而勤雖酷暑作工汗淋漓
下不少懈且強有力能任重致遠故鄉人爭傭之一日鄉某招覆屋告
之曰若者漏係汝昨之密縫未周其善治之卽於屋上對曰吾技止此
耳若更有求可招能者治之鄉人以其言之謙謙也初不介意及午餐
遍覓不得始知其已去招之至再皆不就乃以傭直計日授之亦固辭
詢其故瓦匠曰吾不能稱主人意是以去無功而受祿於心實有未安
奚爲不辭其行事大都類此尤異者妻蠢而健飯瓦匠數日所傭之直
不能供其妻一日之炊恆聽之或謂之曰子貧若茲養此不育蠢婦奚

爲對曰是吾命也若棄之人誰養之不幾驅之死地乎且常爲之理蓬
鬢殊不動意其性情真率如此嗟嗟季世人心機巧滔滔者天下皆是
不意窮鄉中猶有羲皇以上之人噫亦可奇矣東里采訪
員投稿

石明達字尊三州永里張家橋人少業儒賦性剛直尙樸素恆與里中
排難解紛前清知州羅必傳深器重之地方公事多相札委明達經奉
到靡不竭力舉辦無閣置廢弛者性喜讀史作爲輒效往昔嘗課徒天
神堂廟貧寒子弟不取修金以己家既裕宜借此培植也反正後匪亂
如麻里人多被劫明達欲維持之借里中父老籌款補修夜雨寺寨因
遷居焉時烟火數百咸以明達正直推充寨首招勇練團不避艱險總
以保護里人驅逐匪黨爲宗旨公款不敷則典當己產或借貸他人繼
之里中有擒送匪黨至者無論是否熟識有無關係但查明無誤卽轉
稟公署治罪縱有言情與財爲言者輒嚴詞峻推不少瞻徇如是數年
匪類喪膽幾絕跡矣而心則恨之如巨仇屢欲相戕賊恨無其會耳民
國四年元宵前匪用詭詐遣人誑報云某家被劫請追捕明達謂實然
卽率隊往家人勸且緩而先查之明達曰此爲何事而可揖讓抹火乎

合川縣志卷四十七 鄉賢六

去

不從行近所指被劫地匪遽乘其不意四面圍攻槍彈雨下明達身受
重傷猶不懼而督戰益急至肝腸悉露仍舉槍斃一匪乃死時年四十
事聞省長特獎金建專祠今尙未舉行永里采訪
員投稿

謝德順州東里釣魚山人平生果敢好義滇匪亂時年甫成童比賊圍
釣魚山卽能執干戈以爲捍衛嗣後每次練操鄉團辦公無不竭力民
國四年六月二十二夜附近蒲某家被劫德順聞之親執營槍於路側
待匪至狙擊之俄匪果來德順舉槍蒲因得脫殊被眾我寡卒爲匪傷
氣將絕時尚云我在此你敢來連叫數聲而逝嗟嗟德順乃田舍郎也
目未覩千秋之鑑胸未羅百代之書老當益壯視死如歸值茲匪風猖
獗正宜揭之以風世也使人盡如是何患匪之難靖耶東里采訪
員投稿

熊遠之佚其名州永里南漕人世習織造甯綢業于民國六年貸貲自
質生平嫉匪如仇前四年冬充本團練隊曾鎗斃匪二名生獲匪三名
匪欲得而甘心者屢矣是年秋九月遠之質長涪未歸二十日午刻突
匪數十人來糟埽劫將其家貨物搜空時團練因餉乏廢弛紳保均徒
避遠之二十三旋舍憤邀丁壯堵各隘二十四晨匪數十人又從壁山

界來新酢房劫拉團鳴鑼往救遠之當邀同里姜玉林挾鎖子礮先眾赴殊匪悉執快鎗敵良久匪登山向下擊眾潰遠之知勢不可支另持單響鎗聯十人排而前戰頃人皆竄匪從後鎗擊之遠之仆未斃復來匪四人挾遠之至團內雞冠石褫其衣以刀從背脊剖之剖後復彈洞其胸慘矣玉林亦與同歿玉林居大河溝業耕種口訥而品正聞人談狹邪猥褻語輒面發赤民國三四年間本團練挨丁玉林最勤謹曾偵獲匪窩三處爲匪所仇忌六年南槽之劫距玉林住處遠玉林知時匪已去及熊遠之自長涪旋舍約玉林聞鑼礮擊匪玉林諾殊團眾所持皆土礮敵匪快鎗勢迥異且四面已層層圍裹不可出玉林卽捨鎖子礮持刀偕一人挾抬鎗伏土坎欲伺匪而狙擊之不意匪五子彈自坎側貫其腦死團眾以狀聞于知事田慶芬不理請卹賞亦不報今乃爲之合傳焉

永里采訪
員投稿

張仁澤字樹藩州來里大河壩人幼聰穎多知略初從事于縣城巡警以稱職聞民國四年被舉爲本鎮團局隊長值官軍清鄉破獲巨匪頗眾事竣辭去以左鴻鈞代請仁澤爲教練長鴻鈞去徐紹華爲隊長仍

合川縣志卷四七

鄉賢六

十七

留之未久鼈口沱有股匪嘯聚將劫場知事鄭賢書聞之令飭團局率隊從一師排長楊桂瀛所部陸軍往剿時仁澤病已三日紹華強起之行抵梁家坪匪大至楊桂瀛被擄團丁四潰或勸仁澤逃仁澤曰楊陷圍中隊長未在而我不顧去如地方之責何遂率腹心蔣海龍衝鋒往救海龍在前中礮死仁澤猶執鎗步進連發數鎗匪頗有傷者遠大合圍執仁澤去見楊排長方被害叱曰死奴乃敢害陸軍長官邪匪怒鎗擊其身次擊其項猶齧齒罵不休又擊其心乃仆時六年六月二十日也年三十無子鄭知事爲上聞撫卹如例其兄仁澤爲開追悼會鄭挽以聯云鬼伯來乎助我盪盡妖氛赤水安流不再浪男兒死耳爲君請來榮典素靈胥蠻足千秋樹之乎抑哀之也

永里采訪
員投稿

王字玉如一作裕如州來里萬古場人家中貴與兄監生小曾弟武生玉龍同居並僱材武氣蓋一時盜不敢瞰其室顧念南北角力羣匪蠶起非練團無以資保障乃躬率軍費操練以時人得安堵有李五芳者匪首也聚黨百餘恣行劫掠鄉人無可如何以告于王卽率團往抄其家獲贓物百數召各失主認領餘以充公五芳切齒恨之民國

三年三月糾黨劫場時充本團練長督丁往救力戰不勝死之五芳得其屍投于水仍往燬其家至盡事聞令給卹金四十元入祀昭忠祠其秋九月匪復夜劫之殺其弟玉龍去玉龍弟若珠痛念家仇壯心不死復出充保衛團排長獲賊不少今存東里采訪員投稿

蔣國霖武勝縣走馬鄉人初以技勇聞于時浪遊江湖頗有聲名自念此非長策終不得死所乃于民國初元歸家不出會二次革命軍起盜賊滋多州來里二郎場與武勝界接奉知事令練團公請國霖充任團防隊長及時操練設為方略禽獲巨匪慕夥匪深恨之一日偽報匪劫請救國霖遽率隊往中道伏發戰不利被禽誘之降不屈飲彈死年四

十二來里采訪員投稿

李昌科州永里南漕川主廟人父燦光充保董熱心團事首命昌科入團局為練丁竭力于桑梓義務期得保衛治安民國初元團隣陸世興弟兄被拉報經團局派昌科帶丁十餘冒險禽獲羅萬金等數匪送案懲辦匪黨深恨之五年十一月李順烈到局報稱有匪夜劫其家並拉子潤生去昌科等聞命跟追至里餘之豹子溝奪回潤生及贓物多半

合川縣志卷四七 鄉賢六

猶不肯捨更奮勇前進未半里中匪彈死年二十一事聞知事吳南令飭公款收支處撫恤如例永里采訪員投稿

劉春膏佚其名州東里渭子溪人年十五入三才鎮為保衛團練丁明年從排長何光焯剿匪大溪口遇匪大股包抄眾丁駭潰春膏疾呼止之乃同周遠如等衛光焯出險未出遠如中匪彈斃光焯繳械降獨春膏不屈連發數鎗頗傷匪匪怒攢鎗射擊之春膏臂中彈不能持鎗被執匪問亦願降否春膏大罵不從遂飲彈死時年十六東里采訪員投稿

胡桂軒蔣炳臣並州東里獅灘場人桂軒故木工炳臣則務農為業皆以居近團總王國楨見其訓練有方聲譽大著而心慕之先後投身團局為專丁及時操練以便宜駐防或清鄉皆與在行間未嘗有過失同伍皆親敬焉民國七年督軍熊克武赴任過縣城聞安居高樓房為匪巢命陸軍一連往剿令知事鄭賢書派團助之桂軒從其連長李學粹

往見陸軍陷匪圍中亟憤衝鋒馳救匪驟遇生力遽解圍去桂軒等追逐數里至歇馬廟匪徒四起彈中桂軒臂桂軒不顧仍奮奪其鎗未獲復中二彈遂斃年二十二學粹督隊奪其屍還葬本里佛子巖國楨為

開追悼會于治城之火神廟鄭知事來挽以聯云數合陽如君幾人莫
云職位非官品望非紳儘值得滿城追悼到今日當我一拜試問暴客
死法凡夫死病可曾有者等光榮時人爲傳誦焉餘挽聯尙多詳雜記
叢話類明年白峽口團民到局報得大茅坪一帶有土匪多人估寄肥
豬匪謂所拉人爲肥豬多借民房寄之不允則行強俗以凡行強者謂
之估原作估墮羶兒亦當時匪語也本無音訓可求但其字太不正
確今改之如此之如此擾害居民請兵驅逐國楨卽令分防天順寨之排長劉必蕃率
所部往捕蔣炳臣適在行中踴躍爭先有氣吞此虜之概至巖門前天
晚矣必蕃方傳令注意突伏匪四出鎗彈雨下炳臣直前衝突奮不顧
死鏖戰至一小時身中四彈乃斃屍還葬芭蕉坪國楨亦於獅灘場開
追悼會挽聯不少並詳雜記其撫卹金皆優給如章東里采訪
員投稿

補遺

彭德耀字耀廷州東里渭子溪人性忠愨有勇力少而孤貧出外流落道值新置巡撫陶模見而憐之收使爲刈馬芻但不知其時方童稚何以能行至秦隴間若以乞食去則巡撫貴官清道而行何以不在辟除之列得使其親見之也傳者不說其由今亦莫得而詳矣及模出征新置○森楷案模帥新置時無出征事如是從左宗棠去則德耀預在士模官止知縣耳元文侮陶大帥征新置回似非事實德耀預在士兵之列從戰天山南北備受霜雨蠻風勉爲其難遂以克復回城功歷保至儘先守備關隴肅清無所事事乞歸鄉里以熟習營伍操練教習團丁藉畜妻子光緒三十二年充廣安保安營教習突有外匪于黃昏時入城搶劫德耀倉卒出鬪受重傷死年十有東里采訪員投稿

合川縣志卷四十七 鄉賢六

三

爲社長襄理須人函招渭子溪之王治卓小沔溪之張森柏三滙壩之徐梓高成先叔姪等往治事少儀聞之心動亦辭館挾其貲去爲股東適公司乏案牘才少儀至竹陽有成皆大喜卽請爲文牘員薪俸所入與教員相伯仲也少儀安之旣數年矣會鐵路事起同志軍興有成竹陽皆出山奔走國事不暇顧家乃並以眷屬寄公司託照應而去以公司有屯兵能防守也當是時郵電不通謠謠滋至清官吏不能自保土匪蠢動所在騷然公司成效漸昭頗有蓄積爲羣匪涎視風傳將糾眾入掠公司亦岌岌自危隨時警戒而兵數有限邂逅無可請增益惟嚴備以待之一夕匪大至四面攻圍治卓森柏素材武出禦敵少儀等文弱專保眷輜重十餘戰皆捷已而匪來益眾戰不利則令少儀等棄積蓄保婦孺先走森柏治卓爲後殿至振溪江漲無渡路絕矣治卓森柏赴水死少儀自戕不殊卒死于匪吾州之股友殲焉各家眷皆被虜久之竹陽有成共出金若干贖歸寓於嘉定其冬森楷歸自成都有成妻陳森柏妻孟皆附載還舟中爲道前後事若歷歷在目前也森柏字孔休年二十二梓高字玉山年二十餘治卓字奉武一作鳳伍年二十三

聞其生性剛毅好武事居恆以節義自許常慕關忠義之爲人尤喜交豪俠士弱冠游學州城與符佐清爲友佐清約入公司舉領屯兵專任墾場防守事宜于墾務甚有裨益及戰敗或勸其棄眾逃可免難曰吾甯死不背友也遂及於難聞者傷之治卓弟治軍字旅成學名懷義初肄業本州中學校將畢業聞勸業道周善培翔辦商業講習所去中校投考得收錄學成授某縣勸業員未上而國變不果往留滯省城森楷時爲川漢鐵路總公司總理請充鐵道學堂學監善于其職願以治卓死屍不歸恆鬱鬱及森楷去職懷義亦歸里就本里高小校聘六年墾務公司舉充董事懷義欣然往調可徐得治卓死處也及至嘉定而雲南靖國軍起不克往未幾嘉定大水入城懷義轉徙流離既志不得遂又感受潮濕病作客死年二十七無子

東里采訪員投稿森楷樹記

李義德者合州泰安團團丁也清光緒三十三年捕鄰盜中槍死署重慶府知府高增爵以効命維桑四字旌之並題辭曰壯哉死乎足以風矣各團團丁若皆奮身扞難若此盜風庶有豸爾

來里采訪稿

趙世安李樹榮亦東里獅灘場人乙卯團總王國楨旣地方不靖倡辦

合川縣志卷四十七鄉賢六

三

甘露寺團練二君曉然于分子義務投充練丁盡力服勞未嘗過失甘露團威聲大著匪徒相戒不敢入境二君與有力焉丁巳春龍鼎鎮鎮人請合辦國楨義不獲辭成丁兩隊屢出擊匪二君奮勇爭先恥落人後嗣因時變改編爲守備二營叙勞績均提升一等兵戊午十二月連長李學粹奉命率往雙鳳場遊擊十六日奉陸軍張營長命令調往老巖頭勦周吉瑞股匪學粹應調卽於十七日拂曉開拔前往抵目的地時陸軍已被匪圍學粹督隊救援與匪接仗陸軍得乘勢突圍斯時匪徒十倍學粹之兵猶鏖戰不相下世安奮然曰毛賊何足畏單獨衝鋒前進遂中彈倒樹榮在後方見世安中彈趨救之亦被彈傷眾憤然猛攻匪勢少却學粹命人負樹榮歸未至而死又命取世安屍世安左手握槍右手握小樹堅不可開甫解脫樹枝匪徒麇集彈如雨學粹見陸軍全退去亦棄屍整隊徐還次日由團甲送屍到防據土人言是役匪徒死傷甚眾晚卽遁去世安纔二十有五樹榮二十有一學粹詳報營部國楨嘉其勇而悲其死命優葬之照例撫卹并開會追悼團里人士咸稱歎不置云

縣鎮書記陳鼎來稿

